

## EPISTOLA CLXI.

CAESARI CARD. BARONIO

FRANCISCUS LAMATA

DOCTOR THEOLOGUS IN UNIVERSITATE LOVANIENSI.

*De praevenientis gratiae Dei efficacitate ex Augustino.*

**N**uper a me quaesivisti, Cardinalis amplissime, quid de gratiae Dei praevenientis efficacitate, quae res nunc tantopere controversatur, Aurelius sentiret Augustinus, seu potius, quam ego ex illius scriptis inferrem de hac disputatione sententiam. Fecit id quidem humanitas Tua cum insigni quadam animi modestia conjuncta, ut ea a me velle audire significares, quorum ipse apprime conscius esses. Si quid igitur enunciavero immodestiae, si omnino tacuero, inobedientiae reprehendar. Sed dum haeret animus, obedire decrevi, ut obedientia excuset quidquid accuset immodestia. Accipe ergo animi Tibi obsequentissimi expressam significationem, & quaecumque scripsero ita aequibonique consule, ut omnia orthodoxe sentientis, Sanctae Matris Ecclesiae judicio, summissa esse plane intelligas. Quo quidem jacto firmissimo fundamento, opus aggrediar.

Ut immobilis sit veritas praedestinationis, & gratiae, non praescientia meritorum nostrorum fulcienda est, sed praescientia factorum Dei futurorum, quorum ipse praescius electos suos ea vocatione vocavit, qua id, quod praedestinavit, implevit (1). Quae quidem vocatio non est ea, qua vocati sunt, qui ad nuptias venire voluerunt, sed certissima, & efficacissima eorum, (2) *qui secundum propositum vocati sunt, quos praescivit, & praedestinavit conformes fieri imagini Filii sui*. Haec est antecedens voluntatem nostram efficax gratia Dei, quam negare Pelagiani ausi sunt liberum arbitrium extollentes, seu potius in Dei omnipotentiam insolentes, quam parendo, & miserando ipse manifestat. Nam ut Augustinus ad Vitalem (3), & Prosper ad Augustinum scribit, gratiam Dei comitem non praeviam humanorum meritorum voluerunt esse, ac proposita lege, & praedicato Evangelio principium salutis in homine continuerunt, & humanam

VO-

(1) Lucae 14.  
(2) Rom. 8.



(3) Epist. 107. tom. 2.

voluntatem divinae praetulerunt, dicentes, non ideo nos vel-  
 le, quia adjuvi sumus, sed propterea adjuvari, quia volumus.  
 Quo quidem perverso dogmate misericordiam Dei respicientes,  
 ut bene Joannes Maxentius (1) contra epistolam ad Possessorem,  
 quam ipse falso Hormisdæ adscriptam censet, Christum prædi-  
 catorem tantummodo confitentur, Salvatorem vero negant. Im-  
 mo arbitrium nostrum non in eam asserere libertatem conantur,  
 qua nos Christus donavit, ut liberati a peccato servi essemus  
 justitiæ, sed qua liberi justitiæ, servi fuimus peccati. Igitur  
 hi pro sui arbitrii libertate, infirmitatis servitute contententes,  
 gratiæ Dei prævenientis vim eo semper prætextu expulerunt,  
 ne liberum submoveretur arbitrium. Sed tantum abest, ut pro-  
 pterea submoveatur, quantum abest a veritate mendacium, quin  
 potius (Augustino teste (2)), illi oppugnant liberum arbi-  
 trium, qui oppugnant Dei gratiam, qua vere ad bona eligen-  
 da, & agenda fit liberum: id quod Prosper contra Collatorem  
 liberi arbitrii periculum opponentem, si gratia Dei ipsum præ-  
 veniat, disertissimis verbis, gravissimisque sententiis demonstra-  
 vit. *Non est (inquit) periculum libertatis arbitrii gratia Dei,  
 nec voluntas aufertur, cum ipsa bene velle generatur. Nam si  
 ideo non putanda est nostra, quia formatur, regitur, ordina-  
 tur, imbuitur, spoliatur libertate filii Dei, quia qui agun-  
 tur spiritu Dei, perdunt vigorem rationalis animæ, & omni  
 voluntariæ devotionis laude privantur, quibus datur Spiritus  
 Sapientiæ, & intellectus, consilii, & fortitudinis, scientiæ,  
 & pietatis, ac timoris Domini; prorsus qui his reformatio-  
 nibus se non putant indigere, de veteris morbi consuetudine in  
 phrenesim transcunt, respicientes remedium, clamant, insanunt,  
 reluctantur.* Haec Prosper. Ex quibus satis apparet, quam fue-  
 rit inanis cogitatio eorum, qui ob Dei gratiam periclitari ar-  
 bitrium nostrum putaverunt, cum potius e potestate tenebra-  
 rum erutum a servitute ad libertatem, a caecitate ad lumen,  
 a morte ad vitam per ipsius divini muneris efficacitatem revo-  
 cetur.\* Nec veritus est unquam Augustinus acerrimus divinae  
 gratiæ propugnator istorum insaniam, qua in ipsum furentes,  
 fatalis necessitatis prædicatorem jactabant: immo Scripturae  
 Sacrae testimoniis, & fortissimis rationibus ex ipsis petitis, eam-  
 dem repressit, atque coercuit, & gratiæ divinae mirabilem  
 energiam, seu in operationem nostras voluntates prævenientem,

no-

(1) Biblioth. Sanctor. Patr. to. 4. col. 600.

(2) Epist. prox. cit.

notam fecit Ecclesiae. Quid enim aliud nos docent haec: *inclina cor meum Deus in Testimonia tua: (1) & a Domino gressus hominis dirigantur, & viam ejus voles: & spiritum meum ponam in medio vestri, (2) & faciam, ut in praeceptis meis ambuletis, & judicia mea custodiat, & operemini: & cor regis in manu Domini, quocumque voluerit, vertet illud: quid, inquam, aliud haec nos docent, & alia pleraque testimonia ex utroque testamento desumpta, quam Deum per gratiam suam agere quod vult in cordibus hominum, & quo sibi placuerit eorum perducere voluntates? Probat hoc urgentissima ratione Augustinus (3) ex promissione Abrahæ (4) a Deo factae, & ex Paulo (5) his verbis. Quando igitur promisit Deus Abrahæ fides gentium, dicens, patrem multarum gentium posui te, unde dicit Apostolus ideo ex fide, ut secundum gratiam firma sit promissio omni semini; non de nostrae voluntatis potestate, sed de sua praedestinatione promisit. Promisit enim, quod ipse facturus fuerat: quia es facturus homines bona, quae persistent ad colendum Deum, ipse facit, ut illi faciant quae praecipit; non illi faciunt, ut ipse faciat, quod promisit: alioquin, ut Dei promissa compleantur, non in Dei, sed in hominum est potestate, & quod a Domino promissum est, ab ipsis redditur. Abrahæ. Non autem sic credidit Abraham, sed credidit dans gloriam Deo: quoniam quae promisit potens est, & facere: non ait praedicere, non ait praescire, nam & aliena facta potest praedicere, atque praescire. Sed ait, potens est, & facere, ac per haec facta non aliena, sed sua. Haftenus Augustinus; ex cujus verbis haec brevis colligitur ratio. Promissio Abrahæ a Deo facta certissima est ex fide, igitur secundum gratiam: non ergo promisit fidem, quam homines ex se ipsis erant habituri, ut crederent, sed quam Deus daturus erat, & qua facturus erat, ut crederent. Gratia igitur Dei praeveniens effectrix est, ut ex non credentibus credentes simus, & ex nolentibus & reluctantibus in volentes, & non reluctantes omnipotentissima facilitate commutemur. Porro ex verbis Domini secundum Mattheum (6): Non enim vos estis, qui loquimini, sed spiritus Patris vestri qui loquitur in vobis; & ex verbis Apostoli ad Romanos (7): Spiritus interpellat pro nobis gemitibus inenarrabil-*

(1) Ps. 118. Ps. 36.

(2) Ezech. 36.

(3) De praedest. Sanct. cap. 10. tom. 7.

(4) Genes. 17.

(5) Rom. 4.

(6) Matth. 10.

(7) Rom. 8.

*bilibus*, praevenientis gratiae vigorem infert idem Augustinus (1) ad Sixtum scribens. Nam spiritus ita loquitur in Apostolis, & interpellat pro nobis, quia loqui Apostolos, & interpellare nos facit, illisque loquelam, nobisque interpellandi, & gemendi inspirat affectum. Praecedens igitur efficax Spiritus Sancti auxilium, sic expressum est, ut ipse facere dicatur, quod ut faciamus facit, ne quis impie existimare audeat, hoc ita de nobis fieri, tanquam nihil facientibus nobis. Denique ad id comprobandum validissima est ratio Augustini his verbis formata (2): *Prorsus in hac re non operosas disputationes expectet Ecclesia, sed attendat quotidianas orationes suas. Orat, ut increduli credant: Deus ergo convertit eas ad fidem.* Quo itidem argumento contra inimicos gratiae Dei, ejusdem mirabilem, & occultam vim ostendit ad Vitalem scribens, eique hoc de orando documentum sic contra Pelagianos (3) amplectendum suadet, ne ulla menti suae subtrahat oblivionis irreptio, neve ulla caliditas argumentationis extorqueat. *Si enim (ait ille) quod scriptum est: a Domino gressus hominis diriguntur, & viam ejus vult.* (4) *Et praeparatur voluntas a Domino,* (5): *& Deus est, qui operatur in nobis, & velle* (6); & multa hujusmodi, quibus commendatur Dei gratia, hoc est, quae non secundum merita nostra datur, sed dat merita ipsa cum datur: quia praevenit hominis voluntatem bonam, nec eam cujusque invenit in corde, sed facit: si ergo ita praepararet, atque operaretur Deus hominis voluntatem, ut tantummodo legem suam, atque doctrinam libero ejus adhiberet arbitrio, nec vocatione illa alta, atque secreta sic ejus ageret sensum, ut eidem Regi, atque doctrinae accommodaret assensum; procul dubio eam legere, & intelligere legendo, vel etiam exponere, ac praedicare sufficeret, nec opus esset orare, ut Deus ad fidem, infidelium corda converteret; quasi sic brevem conficeret syllogismum. Si proposita lege, atque doctrina Evangelica, situm est in homine initium salutis, & non indiget alio, ut credat, & convertatur, frustra orat Ecclesia, & poscit a Deo, ut nos fideles faciat, nosque convertat. Sed hoc non frustra facit; ergo indiget alio, illa videlicet alta, & secreta vocatione, quam gratiam efficacem dicimus omnia nostra merita praevenientem. Hanc igitur doctrinam de efficacitate gratiae Dei praevenientis Sacrae litterae loquunt-

(1) Epist. 105. tom. 2.

(2) De dono persev. cap. 7. to. 7.

(3) Epist. 107. tom. 2.

(4) Ps. 36.

(5) Prov. 20.

(6) Philip. 2.

loquuntur, hanc utique Augustinus profitetur, hanc Innocentius, Zosimus, Bonifacius, Coelestinus, Leo Romani Pontifices probant, hanc Carthaginense Concilium unum, & alterum Milevitanum in Africa, & secundum Arausicanum in Gallia confirmant, nihilque propterea nostrum arbitrium laedi quisquam Catholicorum unquam affirmavit, cum magis ad bona eligenda, & agenda per eam, de qua dictum est, gratiam, liberetur. Nam etsi verissimum sit, quod sacrum Concilium Tridentinum (1) definivit, posse liberum nostrum arbitrium motum, & excitatum a Deo dissentire, si velit, haec ejus potentia, sive impotentia peccati languore contracta, ita sanatur a gratia, ut voluntas nostra roborata, & confortata etiam quod possit dissentire, non dissentiat, alta illa, ac secreta vocatione, quam ait Augustinus (2), sic agente sensum, ut legi, atque doctrinae Dei accommodet assensum. Sic respondet idem Augustinus opponentibus contra donum perseverantiae, quod amitti contumaciter posset his verbis: *Quomodo potest amitti per quod fit, ut non amittatur etiam quod posset amitti?* (3) Id enim agit perseverantiae donum in eo, cui datur, ut quamvis possit illam respuere, non tamen respuat. Ne ergo terreamur nostrae amittendae potestatis metu propter efficacitatem praevenientis gratiae Dei, immo tutiores ea de causa simus, securioresque vivamus. (Ita legitur in authographo) Nam ob eam rem mirabatur Augustinus (4) Pelagianorum (5) amentiam, quod se malent infirmitati suae, quam Dei gratiae firmitati committere: *qui potens est, (ut ait) ipse & a malo in bonum convertere voluntates, & in lapsum pronas convertere, ac dirigere in sibi placitum gressum.*

Qua quidem de efficacitate praevenientis gratiae Dei ante mille ducentos, & eo amplius annos in Ecclesia Dei stabilita doctrina, & inter ipsam, & liberum arbitrium cum pace Ecclesiae inita concordia; spiritus discordiae malus Lutheri, atque Calvinii exagitavit animos, qui ab Ecclesia deficientes in partem Schismatis abrupti, & in portentosarum haeresum barathrum deturbati, sacrilegis flatibus spirantes, dum gratiam Dei extollunt, arbitrium nostrum perimunt, quo quidem perempto gratiam quoque Dei de medio tollunt. Nam ut ait Bernardus: (6) *Tolle liberum arbitrium, non erit quod salvetur: tolle gratiam, non erit unde salve-*

(1) Sess. 6. can. 4.

(2) Epist. prox. cit.

(3) De dono persever. cap. 6. tom. 7.

(4) De praedest. Sancti, cap. 11.

(5) De dono persever. c. 6.

(6) De gratia, &amp; lib. arb. lib. 1. non longe a prin.

*salvetur. Opus hoc sine duobus effici non potest, uno, a quo fit, altero, cui, vel in quo fit.* Sed debilitatis jam, atque confractis haereticae pravitatis conatibus, & gravissimis Tridentinae Synodi decretis de gratia, & libero arbitrio, orthodoxa fide explicata, curiositas emerfit humana, quae ut ad difficillima semper anhelat, ita difficillimis quoque, & inexplicabilibus nexibus sese implicat, atque involvit. Haec inter fratres discordias seminans, ne idipsum dicerent omnes, novam de modo efficacitatis gratiae quaestionem suscitavit, quae non sine amarulentia animi inter viros doctrina, & religione praestantes agitur: quorum alii ita agere gratiam Dei in nostras voluntates asseverant, ut per physicam praedeterminationem inclinentur ad opera pietatis, alii vero unam, & eandem antecedentem gratiam dicunt, qua unus convertitur, & alter non convertitur, sed in eo ejus efficacitatem constituunt, si detur in talibus, vel loci, vel temporis circumstantiis, in quibus Deus per mediam, quam vocant scientiam, infallibiliter scit voluntatem nostram cooperaturam: sicque non per physicam illam praedeterminationem, sed per motionem, ut loquuntur per modum causae moralis, agi arbitrium nostrum profitentur. Et quamvis Augustini temporibus non venisse id umquam in controversiam existiment, sic tamen utrinque certant, ut iisdem argumentis se invicem oppugnent, quibus Augustinus, & Pelagius manum mutuo consegebant. *Avertat Deus ne de elisaram argumentationum ratiunculis fracta studeant arma colligere, (utar Prosperi verbis) (1) Et ne cineres extincti Dogmatis resovendo, deficientis fumii nitorem in reditivam flammam conentur accendere.* Verum si inter hos Augustinus constituendus est iudex, hanc, quam novam putant, videtur vir sanctissimus, pariterque doctissimus litem diremisisse. At ipse nec hujus, nec illius partis modum expresse dixit, immo mirum est, si alteri ex duobus expresse non contradixit. Nam propterea Pelagiani fatalis necessitatis praedictatorem Augustinum dicebant, quia gratiae efficacitatem, energiam, & inoperationem ex parte principii constituebat. Aliter enim vel irridenda omnino Pelagianorum de fato objectio, vel irridenda magis Augustiniani haebetudo ingenii, si tam ineptam ratiunculam nullo non negotio dissolvit. Praeterea non quacunque vocatione, sed alta quadam, atque secreta nostram agi conversionem locis saepe allegatis affirmavit (2), duasque vocatio-

nes

(1) Prosp. con. collat.

(2) De praedest. San&amp;. c. 76. tom. 7.

nes distinxit, certissimam, & efficacissimam unam, alteram non item. Non igitur unam, eandemque vocationem omnibus tribuebat: Praedeterminationis vero physicae vocabulum nimis rigoris nescio quid in aures instillare videtur contra eam, quae in libero arbitrio requiritur, indifferentiam, ne potius necessitate cogatur, quam libera voluntate trahatur. At vero Augustinus totus in efficacitate gratiae prevenientis est, ut ex iis, quae diximus constat, eoque modo ab ipsa voluntates hominum preparari, immutari, agi, converti, perfici asseverat, ut salva semper maneat nostri libertas arbitrii, ne ad opera pietatis trahatur invitum, sed ad eadem eligenda convertatur liberatum. Si autem ab eo modus quaeratur, quo Deus per gratiam suam id in nobis operatur, non per praedeterminationem physicam, non per motionem moralem ad formam jam expressam id fieri in cordibus nostris respondet, sed miro quodam, & ineffabili modo. Quod multa ejus testimonia palam faciunt, nam libro de praedestinatione Sanctorum sic ait: (1) *Deus fidem nostram operatur miro modo agens in cordibus nostris, ut credamus, & ibidem* (2): *Cum Deus vult fieri, quod non nisi volentibus hominibus oportet fieri, inclinatur eorum corda, ut hoc velint, eo scilicet inclinante, qui in nobis mirabili modo, & ineffabili operatur, & velle.* Rursus verba illa Joannis: (3) *Omnis qui audit a Patre, & didicit, venit ad me,* expendens Augustinus pro mirabili gratiae Dei efficacitate, ait eodem libro (4): *Valde remota est a sensibus carnis haec schola, in qua Deus auditur, & docet. Multos venire videmus ad Filium, qui multos credere videmus in Christum. Sed uti, & quomodo a Patre audierint hoc, & didicerint, non videmus: nimium gratia ista secreta est, gratiam vero esse quis ambigat? Haec itaque gratia, quae occulte humanis cordibus divina largitate tribuitur, a nullo duro corde respuitur. Ideo quippe tribuitur, ut cordis duritia primitus auferatur. Et alibi saepius ubi de hac gratia mentionem facit, altam, secretam, occultamque dicit. Quibus omnibus locis efficacitas praevenientis gratiae ab Augustino asseritur, modus vero agendi ipsum agit in admirationem, nec tanti se putat, ut hoc valeat explicare. Mirabilis sane modus est, quo Deus opera nostra operatur in nobis non coactis, sed volentibus nobis. Hoc est totum, & prorsus stupendum divinae*

(1) Cap. 2.  
(2) Cap. 10.

(3) Joan. 6.  
(4) Cap. 8.

vinæ gratiæ opificium, quod rueret quidem, si vel arbitrium, perimeret gratia, vel ipsa ab eodem praeveniretur, essetque plusquam mirabile, si voluntas nostra ad opera pietatis mortua se ipsam sine spiritu vivificante suscitaret. Difficillima certe hæc disputatio est, & ob eam causam eo moderamine temperanda, ut magis inquisitio cauta laudetur, quam reprehendatur assertio. Etenim juxta Augustini regulam, ubi de re obscurissima agitur non adjuvantibus divinarum Scripturarum certis clarisque documentis, cohibere se debet humana præsumptio; nihil faciens in partem alteram declinando. Quam ut a se præscriptam, ipse auctor in re, de qua agitur, fideliter observavit, & asserentibus efficacitatem gratiæ prævenientis scripturarum apertissimis testimoniis eandem constanter asseruit: modum vero efficiendi mirabilem dixit, ne si hunc, vel illum præscriberet, non suffragantibus certis scripturae testimoniis & auctoritatibus, incauta in eo reprehenderetur assertio.

Hæc sunt, Cardinalis amplissime, quæ pro mea parvitate ex Augustino decerpta, Tibi libenter inscribo, scio enim, quos sis animo erga Ecclesiam Dei, quam pro dignitate, qua fungeris, juvare semper studes, & vitæ integerrimæ exemplo, & præclarissimis doctrinæ editis monumentis, quamque absque scissuris inter fratres ardenti pietatis desiderio semper optas in pacis tranquillitate versari. Faxit Deus, ut glutino charitatis copulati, scientia non inſtetur, volentes sapere plus, quam oportet sapere, nec modum, quo agitur nostra conversio, curiosius, quam decet, fideles investigemus; sed id tantum sapere contenti simus, quod, (ut ait Prosper fidelissimus (1) Augustini discipulus, & interpret) agit hoc occulta, & potens gratia Dei, quæ dimotis terrenarum opinionum, & operum mortuorum favillis terrorem obruti cordis exagitat, & desiderio veritatis inflammat, non ut invitum hominem subigat, sed ut subjectionis cupidum faciat, nec ut ignorantem trahat, sed ut intelligentem, sequentemque præcedat. Manens enim liberum arbitrium, quod utique cum ipso homine Deus condidit a vanitatibus, & cupiditatibus suis, in quas neglecta Dei lege fluxerat non a se ipso, sed a Creatore mutatur, ut quidquid in eo melius reficitur, nec sine illo sit qui sanatur, nec nisi ab illo sit, qui medetur: (2) cujus sumus nova Creatura, novumque figmentum creati in Christo Jesu in operibus bonis, quæ præparavit Deus, ut in illis ambulemus.

EPI-



## EPISTOLA CLXII. (a)

CAESARIS CARD. BARONII

AD PETRUM DE VILLARS ARCHIEPISCOPUM VIENNENSEM. (b)

*Afferit se legisse libros Molinae, & in illis notasse quinquaginta  
& amplius positiones, verba, phrasas affines erroribus  
Pelagianorum sive Semipelagianorum, &  
S. Augustino contrarias.*

**I**llustrissime ac Reverendissime Domine. Ignoscas, si tardius quam par est, ad litteras Reverendissimae D.V. rescribo, quas ut sanctas, puras, & orthodoxas in omnibus exosculatus sum: a quibus absit, ut vel in minimo apice, vel puncto dissentiam: tantummodo de libris Molinae remanet controversia. Legi eos sed non sine stomacho; quum in illis nihil potentius agere praeferat, quam sancto Augustino adversari ( licet sanctum nunquam nominet ), cumque oscitantiae redarguere, seque illo in iis disputationibus vigilantiores acutioremque jactare. Quis pos-

(a) Fidelissime descripsimus hanc epistolam ex codice Bibliothecae Vallicellanae signato litt. Q. num. 44. in quo est epistola manu Baronii scripta non exstat, extat tamen ex manu Amanuensis ipsius Baronii, ut manifesto liquet comparantibus, alias ab eodem Amanuensi exaratas. Nec mirum videri debet si authographa non habeatur, quum authographum auctor misisset ad Archiepiscopum Viennensem, unde apud se retinuit exemplar, quod conficere solent amanuenses, nec nunc quoque usitato in aulis Cardinalium & Principum, maxime cum de gravissimis rebus agitur; neque tanto orio abundabat Baronius, ut manu sua exscribere posset exempla litterarum, quas quotidie ad clarissimos viros mittebat, quod si fecisset, hominem se valde otiosum, suaeque maximi facientem ostendisset; id vero quam a Baronii moribus absuerit, maxima ejus opera, summaque modestia illius clarius ostendunt, quam ut probatione indigeant. Codex autem Vallicellanus, in quo legitur haec epistola, haud recens est, sed jam inde ab obitu Baronii inter ceteros codices illius numeratus, sanctaeque custoditus, adeo ut nemini fuerit lo-

cus hanc interpolandi epistolam tantum abest, ut eam huic codici a recentiore manu adjectam fuisse, suspicari possit.

(b) Hic Lugduni natus, Turnoni humaniores litteras adeptus, Lutetiae in Regio Navarato Gymnasio, dum Theologiae operam daret, Patruo in Sede Episcopali Mirapicensi substitutus ( qua per decennium administrata ) Viennemem Archiepiscopatum adeptus est. Pro duplici Praefuli officio, & pietate & doctrina enitere diligentissime studuit. Et pietate quidem in Deum fuit flagrantissimus, quem sacrum ignem quotidianis sacrae meditationis matutinae pabulo sollicite fovebat nutriebatque. Accedebat quotidianae incruentae hostiae immolatio, & frequentissimus Spiritualium colloquiorum usus. In litteris vero, sacris praesertim, quantum praeflaret, praeter elogia de eo laudatissimorum Scriptorum puta Ven. Card. Baronii, Francisci Toleti, Antonii Possevinii, Justii Lipsii, Petri Fabri Allobrogis, & aliorum, luculenter ipse suis ingenii foetibus prodidit, quos duplici volumine in lucem edidit, *De Simonia fiduciaria: de Beneficiorum residua: de Sacellorum atque obituum fundatione: de celebratione* Sa-

posset eum talia loquentem absque nausea tolerare? Licet ut anguis effugiat, & e manibus facile elabatur, ut & si temerarium quis inveniat, haud facile possit haeresis convincere, & suggillare. Non hujusmodi commentatoribus indiget Ecclesia Dei, quae puritate, candore, nitore delectari tantummodo consuevit ipsa non habens maculam, neque rugam. Legi, inquam, eum & ad quinquaginta & amplius notavi positiones, verba, phrasas (a), quas vel saltem affines esse erroribus Pelagianorum, sive Semipelagianorum (licet ipse cautius intra Catholicae fidei limites, vel protestando saltem se contineat) nemo puto, qui absque privato affectu illa perlegerit, negabit omnino. Quid Ecclesia Dei indiget hujus Molinae libris, ut discat, quae a tot Sanctis Patribus, Conciliis, atque Decretis jam ante tot secula didicit, & docuit? Quod ad ipsum DD. N. Clementem Papam pertinet, hoc ipsi in proposito, hoc in voto, hoc denique in decreto, ut nec latum unguem, a vestigiis praedecessorum recedat; sed iisdem instat quam firmissimè. Scit plane tot sanctos Pontifices, Innocentium, Sixtum, Coelestinum. Hormisdam, ac denique Felicem, cujus sunt Canones Arausiacani Concilii, hoc professos suis scriptis esse, atque testatos, Romanam Ecclesiam in iis, quae spectant ad gratiam, & liberum arbitrium, sequi semper consuevisse sanctum Augustinum. Testatur equidem id tot verbis Hormisda suis litteris, ita ut alio iudicio opus non sit, cum jam praejudicatum sit: laborat tum in discutendo Molinae volumine, de quo abjiciendo, vel purgan-

*Sacramenti Matrimonii: de Medici erga aegros officiis: de vanis juramentis atque blasphemis, aliisque nonnullis argumentis. Idem, ut aboleretur antecedent aevi corruptela, qua Gallicani Praefules concionandi munus vere Apostolicum, & ut Tridentinum sacrum Concilium monet, Episcoporum maxime proprium, tamquam extraneum avertabantur, strato aliis iungere, effecit. Demum recogitatur annos suos, & ad extrema se comparaturus, homo, minime ambitiosus, insulsi sponte cessit post annos quatuor supra triginta, quibus Antistitem laudatissime egerat. Ne tamen omnino cessare, aut otio torpere videretur, eam Viennensis dioecesis partem, quae tractu Vivariensi ad Rhodanum continetur, sibi potissimum excolendam sumpsit, quod haereticum sentibus ac veptibus horreteret, etiam ante Calvinianorum rhamnos iis in locis conatos, ac per Galliam profeminatos,*

Apud S. Genesium de Vallae ditionis suae, locum secus Lugdunum die XVI. Julii anno MDCXIII. senescentem annorum septem supra sexaginta, dierum ac meritorum plenus morte pia commutavit. Bibliothecam Patribus Societatis Jesu legavit, ac Viennae in eorum Ecclesia sepelliri voluit.

(a) Sinceritatem hujus epistolae manifestissime probat censura propositionum Molinianarum (quam vulgamus nunc pag. 12.) nobis exscripta ex codice manuscripto authentographo ejusdem Baronii in Vallicellana Bibliotheca signato ltr. Q. n. 41. Instituta enim hujus characteris Baroniani comparatione cum duodecim tomis manuscriptis authentographis Annalium in Vaticana Bibliotheca adservatis, & cum reliquis operibus, quae Baronii manu exarata extant in Bibliotheca Vallicellana, adeo litterarum formae secum conveniunt, ut ovum non sit ovo similis.

gando, vel retinendo, adhuc sub iudice lis est. Mea siquidem sententia, eo non indiget Ecclesia Catholica, in quo vel saltem quaedam auditui horridula essent corrigenda. Monui RR. PP. meos Societatis Jesu, ne aestimationem eorum in defensionem librorum ejus periclitari sinant, & in discrimen adduci. Colo ipsos omnes, Deus scit, ut Patres, ut de ipsis illud usurpem, *opprobria exprobandum tibi ceciderunt super me*: at nolo prolixior esse. Vale, Pater amantissime, atque dilectissime, lucerna pedibus meis, cum per obscura contingerit ambulare. De beatis viris in SS. numerum collocandis ad aliud tempus servavit hoc Deus. Romae Idibus Martii anno Domini MDCLII.

V E N E R A B I L I S

## CARDINALIS BARONII

C E N S U R A

IN LIBRUM, DE CONCORDIA GRATIAE  
LIBERIQUE ARBITRII P. MOLINAE

N U N C P R I M U M E D I T A

Ex ejusdem Authographo, quod extat in Tabulario  
Bibliothecae Vallicellanae signato litt. Q.  
num. XXXXI.

**Q**uod Romana Ecclesia tenere se obligaverit de gratia ; &  
libero arbitrio, quae Sanctus Augustinus tenuit .

Est de his Epistola Coelestini Papae, qua consultus ab Hilario,  
& Prospero scripsit ad Episcopos Galliarum, & de Sancto  
Augustino praeconium tale habet Tom. V. ann. 431. nume-  
ro 184. Coelestini Epistola laudatissima num. 138.

Est Epistola Hormisdæ ad Possessorem, in qua tradit Romanam  
Ecclesiam consentire cum S. Augustino, praecipue in Episto-  
la ab eo scripta ad Prosperum, & Hilarium, extat Tom. VII.  
Annal. ann. Domini 520. num. 21.

## DE CAPITULIS ROMANAE ECCLESIAE.

**Q**uid senserit de his Romana Ecclesia in quibusdam capi-  
tulis ab ea editis contineri testatur Hormisdæ in Epistola  
ad Possessorem Tom. V. ann. 520. num. 21.

Fortasse haec illa sunt capita, quae habentur in Epistola Coele-  
stini ad Hilarium, & Prosperum, quorum est mentio in  
Annalib. anno Domini 431. num. 185.

Concilium Arausicanum secundum profitetur se accepisse Capi-  
tula, quae recitat Romana Ecclesia .

Qui

*Qui sint Errores Fausti.*

**E**rrores Fausti collecti habentur in Epistola Maxentii Monachi ad Hormisdam, quae extat Bibliothec. Sanct. Tom. IV. Summatim perstringuntur *ab Adone*. Vide Tom. VI. Annal. ann. Domini 490. num. 31. Errores Fausti ubique damnati. Ibi num. 32. 33. Qui contra eundem Faustum scripserunt, ibidem.

Sententia Sancti Augustini, quod Deus adeo efficacem gratiam concedat peccatori, ut non possit non velle. Quod non semper, sed aliquando. Et haec est opinio Dominicanorum. Controversia est quoad modum, quomodo Dei gratia suffragetur peccatori efficaciter.

Dominicani, quod Physice. (Physice movere est determinare ad *unum*, ut non possit non esse quod vult.) Dicitur physice, exemplo naturae, quae operatur, *idest* infallibiliter, quando Deus vult, & cum quo vult.

Jesuitae negant physice determinari, sed tantum moraliter, hoc est suadendo, alliciendo, sive bonis, sive deterrendo malis.

His praesuppositis, considerandus est status hominis, videlicet in natura integra, & in natura corrupta. In natura integra, liberrima erat operatio voluntatis. In natura corrupta non est libera voluntas ad bonum ex se, sed tantum ad malum.

*De necessitate, & contingentia.*

**I**N omnibus operationibus duo sunt considerata, contingentia ex parte nostra, necessitas ex parte Dei. Quae non dicitur necessitas simpliciter, sed necessitas consequentiae, quoniam cum omnia in Deo sint, potentia, & actu, & dum actu sunt, fieri non potest, quin sint: hac de causa, quae sunt in nobis contingentia, in Deo dicuntur necessaria necessitate consequentiae.

*De occasione hujus controversiae.*

**E**X haeresi Lutherana, damnata in Concilio Tridentino, ubi Canon de libertate arbitrii in justificatione. Ubi tamen Jesuitarum..... de hac controversia.... (a)

Quorum occasione Lovanii Jesuitis conclusionibus rem defendentibus de motione voluntatis humanae ad Deum moraliter; Universitas Lovanienſis censuram edidit gravem. Respondentibus Jesuitis, eadem Universitas apologiam luculentissimam edidit. Replicantibus Jesuitis rur..... Lovanienſes ediderunt aliam apologiam, Hinc-res per libros confecta est, auctore Molina.

Hinc res delata in Hispaniam, ubi ab Archiepiscopo Cardinali Toletano damnatus est liber Molinae, qui deinde rursus editus est in Portugallia.

Ex Hispania res delata est in Gallias, ubi contradicendum est a Sorbonensibus & aliis.

Hinc in Urbem delata est controversia.

Propositionum aliae simplices, sive de primo adjacente, aliae modales, sive de secundo adjacente.

Simplices; ego lego, sive non lego. Modales; contingit me legere, non contingit me legere.

Alia subdivisio harum propositionum. Aliae sunt de praeterito, aliae de praesenti, aliae de futuro. De quibus hoc est praeteritis, & praesentibus erit vera affirmatio, vel negatio. In futuris contingentibus non est vera, neque affirmatio, neque negatio.

Quod voluntas humana circa actus naturales, & supernaturales libera sit circa nolitionem, & volitionem. Sunt actus naturales volitiones indifferentium, ut plantare vineas, ire in Urbem &c. vel circa mala, ut velle vitia &c.

Volitiones supernaturalium est bonum velle, vel nolle, quod Dei gratia proponit animae, ita ut sit in potestate ejus velle, vel nolle cooperari, & non cooperari, & elicere actum repugnantem. Id ex Concilio Tridentino sess. 6. cap. IV.

**MOLI-**

(a) Duo, aut tria hic verba desunt, quae licet summam adhibuerimus diligen-

tiam, legi tamen in authographo minime potuerunt.

## MOLINAE PROPOSITIONES.

- I. **T**ENET Molina, absque auxilio speciali gratiae Dei, sed tantum generali nempe viribus naturae posse hominem libero arbitrio velle, & operari bonum, non tamen ad finem supernaturalem, nempe ut sit meritorium. Et in hanc sententiam distorquet illud Apostoli: Non sumus sufficientes cogitare aliquid a nobis, tanquam ex nobis, sed omnis sufficientia nostra ex Deo est &c. In hancque sententiam distorquet alia S. Augustini dicta: Ceterum dempto fine supernaturali, posse hominem velle, & operari bonum absque Dei gratia.
- II. Tenet Molina, quod viribus naturae quis possit fidem percipere sine speciali gratia, sed non ad finem supernaturalem; esseque in facultate liberi arbitrii, solis viribus naturae absque concursu speciali gratiae percipere fidem, *credendis* assensum praebere, non tamen ad *finem* supernaturalem, hoc est ad justificationem, & salutem.
- III. Tenet Molina post habitum infusum fidei per gratiam Dei, ad eliciendos actus credendi supernaturales fini supernaturali accommodatos, satis esse generale auxilium Dei, nempe vires naturae.
- IV. Tenet Molina, ut in Fidei gratia, qua credit homo post gratiam Dei praevenientem, libero arbitrio ut auctori tribuatur, ut credat, Disp. IX.
- V. Tenet Molina, quod facienti, quod in se est, Deus conferat gratiam praevenientem. Item dicendum de gratia praevenienti, ut peccator fidelis justificetur. Disp. X. Adeo etiam ut si datus in reprobum sensum peccator faceret quod in se est, Deus non sit denegaturus gratiam suam.
- VI. Tenet Molina, suo conatu hominem elicere a Deo gratiam; Disp. XI.
- VII. Tenet Molina non esse auxilium gratiae causam solam, ut quis fidei assentiatur, vel ad poenitentiam agendam convertatur, sed liberum arbitrium, Quaest. XII.
- VIII. Ibidem, non a sola quantitate, & qualitate gratiae auxiliorum pendere, quod quis ad Christum accedat, sed simul a cooperatione liberi arbitrii; nec minus praecipue a libero arbitrio pendere, quam a gratia.

Protestatio Molinae in fine Disp. XII. notanda.

- IX. Tenet Molina naturalibus viribus liberi arbitrii absque speciali gratia elici posse actum sperandi, Disp. XIII.
- X. Tenet Molina, quod possit homo libero arbitrio absque speciali gratia, sed generali tantum auxilio, hoc est viribus naturae habere contritionem, sive attritionem, Disp. XIV. membr. 1. Eadem membr. 3. plenius.
- XI. Tenet Molina, solis viribus naturalibus absque speciali gratia Dei posse hominem libero arbitrio diligendi Deum, super omnia actum elicere, non tamen absque speciali gratiae auxilio implere.
- XII. Tenet Molina a Patribus non cognitum, neque in controversiam inductum, utrum definita de gratia, & libero arbitrio spectarent ad actus supernaturales, vel tantum naturales, Disp. XV.
- XIII. Ait Molina Patribus antiquis atque Augustino parum luminis fuisse circa ea, quae ad gratiam spectant,
- XIV. Addit: si Pelagius consensisset Patribus non posse elici a voluntate nostra, absque divina gratia actus supernaturales necessarios ad salutem, secus in naturalibus, non fuisset damnatus a Patribus.
- XV. Quomodo eludat omnes sententias S. Augustini, & Divinae Scripturae. Ibidem ad quintum, & sextum.
- XVI. Addit ad septimum, eadem disputatione Spiritum Sanctum in Conciliis pro qualitate hominum convocatorum operari solitum, ut definitiones magis aut minus perspicue editae...
- XVII. Ex Disp. XV. ad 8. quod Arausicanum Concilium loquatur de actibus, qui ad salutem sunt necessarii. Sic etiam & eludit Concilium Tridentinum ibid. ad 9.
- XVIII. Tenet Molina in fine ejusdem disputationis hanc conclusionem, post justificationem, & accepta jam auxilia divina esse liberi arbitrii hominis augmentum adjicere, & perseverare.
- XIX. Ex Disp. XVIII. Homo constitutus in gratia, potest absque speciali gratia suo libero arbitrio *statuere velle* in observatione mandatorum perpetuo permanere, perficere autem sine speciali gratia non potest.
- XX. Disp. XIX. Membr. 1. Prima sententia, quod per vires liberi arbitrii absque speciali auxilio gratiae, non potest homo



*aliquas* vincere tentationes, nec ad modicum tempus; haec est prima sententia Patrum. Secunda vero quod potest aliquas vincere, & ad modicum tempus, non autem ad longum tempus omnes, sic & posse servare singula praecepta, non tamen ad longum tempus omnia servare absque speciali gratia.

Molina censet, & bene priori non recedendum, quia communis Patrum, Conciliorum, nisi (ut ait) Ecclesia non desinat, vel recipiatur frequentiori opinione in scholis. Memb. 6.

XXI. Disp. XX. Stat vera sententia hominem generali auxilio absque speciali gratia vitare non posse, diuque perseverare absque peccato mortali, neque vincere singulas tentationes, licet absque hoc, vel illo possit, & vincere hanc, vel illam possit.

XXII. Et cum auxilio speciali gratiae Dei hominem non posse omnia venialia peccata vitare, licet hoc, vel illud possit.

Molina causam assertit ex ea impossibilitate, quae potius difficultas dicenda est exemplo talorum jactu, ut millies quis jaciendo semper idem reddat signum, idque fieri non physice, sed moraliter cujusque libero arbitrio ad servanda, cum naturalibus tantum viribus singula praecepta, & singula peccata tam mortalia, quam venialia vitanda. Physice fieri dicitur, cum incumbit necessitas mathematica.

XXIII. Q. 22. Dicta S. Augustini, quod liberum arbitrium non est liberum ad bonum, sed ad malum sine gratiae auxilio, interpretatur Molina ad hoc, ut opera sint meritoria, conducentia ad vitam aeternam, quodque non est loquutus Augustinus de actibus humanis indifferentibus, vel moralibus.

Responderem, quod ut quid sit meritorium non dependet ex voluntate nostra, sed ex voluntate, & gratia Dei secundum illud: gratiam, & gloriam dabit Dominus; estque quiddam extrinsecus, & non dependens ab humana voluntate, unde absolute dicendum putarem, quod voluntas nostra non potest boni aliquod operari etiam morale, si illud morale vere bonum sit, nempe perfecta virtus, & non apparens, per inanem gloriam intus corrupta: nam omne datum optimum, omne donum perfectum de sursum est &c. Quod ergo opera nostra sint meritoria, non ex sui natura provenit, quia scilicet facta sint ex libero arbitrio nostro, sed ex gratia Dei, alioquin gratia non esset gratia, sed retributio. Sed quis dedit illi, ut retribuatur ei?

Quod opera moralia verae, & perfectae virtutis effici non possint sine speciali gratia Dei; unde deducitur argumentum, quod illa placeant Deo, ut de operibus Cornelii Centurionis dicitur in actis, & aliis. Sed sine fide impossibile est placere Deo, ergo. his fides non tollenda, sed ejus ordinis esse fideles, de quibus Apostolus, qui fuit in occulto Judaeus, sicut & Job in lege veteri. Virtus expendenda propter se ipsam, non propter alium finem terrenum. Porro operari propter se ipsum, & operari secundum finem suum, ipsa vero pura virtus & ipse Deus, qui in Divinis Scripturis dicitur Sapientia.

Addo etiam, quod si posset facere opera moralia Christianus, absque speciali auxilio gratiae Dei, sequeretur inconveniens, quod minus, quidem posset Christianus constitutus in gratia, quam in peccato, quoad eliciendos virtutis actus: nam ille tunc potest, ut dicit Molina, sed in gratia constitutus non potest facere opus meritorium, quod quidem in eo, quod spectat ad eliciendos actus, idem est cum priori. Potest ergo ille eisdem viribus naturalibus elicere actus, quos non potest iste constitutus in gratia absque speciali auxilio gratiae, ergo plus tribueretur homini constituto in peccato, quam in gratia, quia ille potest, quod iste non potest.

Ut sit opus meritorium, & non meritorium non ex differentia actuum esse videtur, sed ex Dei gratia praeveniente, & coadjuvante, quia ille qui inimicus nihil potest generare, quod sit aeternum, iste quia amicus, quod generat est aeternum. Arbor mala non potest bonos fructus facere: arbor bona, non potest malos, hoc est caducos, & pereuntes fructus facere.

Ut ergo opus sit supernaturale, hoc est meritorium, hoc non habet ex influxu liberi arbitrii, sed ex gratia Dei, quod etiam ipse profitetur Molina Disp. XXXVII. ad finem.

*Communis omnium sententia*, quod voluntas Dei sit ratio tantum & causa praedestinationis Sanctorum, & reprobationis damnatorum, cum illis operando ex misericordia, cum istis ex iustitia.

*Quomodo operetur cum praedestinis*, & quomodo cum reprobis pag. 326. 2. 327. &c.

*Sententia est Dominicanorum*, eo quod illis det gratiam efficacem Deus, istis sufficientem, sed non efficacem, adeo ut tota efficacia sit ex gratia.

- XXIV. Sententia Molinae haec est, ut tota efficacia & non efficacia pendeat, & sit ex libero arbitrio pag. 327.
- XXV. Sententia Molinae de praedestinatione. Praedestinationem esse secundum praescientiam usus liberi arbitrii, sed ex sola libera, & misericordi voluntate Dei pag. 331. & inferius pag. 332. hoc *ita modificat*. Ita ex sola voluntate Dei esse praedestinationem Sanctorum, ut non fuerit sine praevia illa scientia, habitaque consideratione usus liberi arbitrii futuri, tamen non pro qualitate illius dona gratiae conferentur.
- XXVI. Addit; S. Augustinus idem respondisset, si de his, de praescientia usus liberi arbitrii loquutus esset. Obloquitur Molina in S. Augustinum, dum asserit ista de praevio usu liberi arbitrii non attendisse, & in quadam quasi caligine esse versatum. pag. 332.
- XXVII. Sententia Molinae, quod Deus non determinet voluntatem, sed tantum invitet, & alliciat pag. 335. 336. 337.
- XXVIII. Sententia Molinae nullum adustum praedestinatum esse ad vitam aeternam, nisi per propria merita, non autem propter propria merita pag. 349. 350.
- XXIX. Ibidem Molina, quod effectus divinae praedestinationis, pendet ex libero arbitrio nostro, tanquam a causa, pag. 353. col. 2. 354. 1.
- XXX. Molina, quod consensus, sive concursus liberi arbitrii ad gratiam praevenientem, non est effectus gratiae, sed ipso libero arbitrii. pag. 356. Contrarium aliis ex adverso dicentibus, nempe concursum illum esse effectum praedestinationis, & gratiae. Molina vero gratiae tantum esse dicit, monere, suadere, excitare, & provocare, non autem impellere.
- XXXI. Molinae de praedestinatione sententia pag. 357. Primo, quod praedestinatio sit libera Dei voluntas dandi electis gratiam, & gloriam absque praeviosis futuris meritis. Nihilque dari ex parte hominis, quod integri effectus praedestinationis causa sit, quae est tantum Dei voluntas, sicque praedestinationem esse secundum qualitatem usus liberi arbitrii, non tamen ut mensura, vel conditio.
- XXXII. Secundo. Praedestinationem non esse sine praescientia boni usus liberi arbitrii, non tamen ut mensuram, sive conditionem, neque ut congruum videretur: potuisse tamen

ad

ad bonum usum liberi arbitrii respexisse, & propter eam circumstantiam aliqua ipsis largitum esse, quae si non praevидisset largitus non esset, sed ex decenti ratione id fecisse, non tamen ut acceperit usum liberi arbitrii esse causam congruentem, quam negat omnino ipse pag. 375. col. 2. in fine.

XXXIII. Quod certitudo praedestinationis non sit ex parte praedestinati, qui forte non cooperaretur, sed ex parte divinae praescientiae, qua praevидit eum sua libertate cooperaturum pag. 376. 1. Sed non quia illud praevидit Deus, certe futurum est, sed quia futurum est illud praevидit Deus, cum semper remaneat libertas arbitrii integra.

Tota vis disputationis in eo includitur, quod ait Molina auxiliorum efficaciam pendere ex libero arbitrio. Adversarii vero dicunt pendere ex voluntate divina, quia agit, ut id omnino fiat. Molina repugnat, & dicit ex hoc induci fatum, qui reprobat responsum de sensu composito, & sensu diviso pag. 378. 2. 379.

Absolvitur prima pars concordiae Molinae. In secunda parte de praedestinatione agitur, atque hoc ordine, primo quod Deus non sit causa peccati, est q. 30.

Disp. XXX. Quod Deus non sit causa peccati, quod Deus non praedestinat aliquem ad malum, sed ad bonum.

Disp. XXXI. XXXII. XXXIII. XXXIV. &c. An Deus dici possit, & quomodo causa peccati.

Disp. XXXV. De auxiliis particularibus, & supernaturalibus, quae a Deo homini, &c. Incipit *tractatio*.

XXXIV. Disp. XXXVI. Cum duo concurrunt ad bonum opus, gratia, & liberum arbitrium, quod ad actus substantiam credendi, sperandi, & poenitendi a libero arbitrio sint, & gratia autem praeveniente habeant, ut sint meritorii, idest supernaturales, & ad salutem necessarii.

XXXV. Disp. XXXVII. Quod adhibito generali auxilio & speciali gratiae praevenientis, ad eliciendos actus meritorios, non indigeat liberum arbitrium gratia coadjuvante.

XXXVI. Quod gratia praeveniens non differat a gratia coadjuvante, sed praeveniens eadem sit adjuvans, nec alia gratia indigeat liberum arbitrium ad producendos actus.

XXXVII. Quod non pro quantitate gratiae cooperantis sit cuiusque operatio major, vel minor, sed ex libero arbitrio magis & minus cooperante,

XXXVIII.

XXXVIII. Quod concursus gratiae praevenientis non est alterius rationis ab eo, quo Deus concurrit ad effectus mere naturales, nempe generali.

XXXIX. Quod post acquisitos actus fidei possit homo solo concursu generali absque speciali gratia operari, & elicere actus.

XL. Sed admittit gratiam cooperantem, esse tantum primum-motum in libero arbitrio.

Disp. XXXVIII. *Appendix ad superiorem.*

Quod eadem sit gratia praeveniens, quae cooperans.

Quod idem sit liberi arbitrii consensus, & cooperatio.

XLI. Quod auxilium efficax, inefficax reddi possit per nostrum liberum arbitrium non cooperans, sicque ex libero arbitrio pendere, quod auxilium sit efficax & quod inefficax.

Contraria sententia est: primo non sufficere gratiam praevenientem ad justificationem peccatoris, sed requiri cooperantem, eandemque efficacem.

Secundo gratiam cooperantem ex se esse efficacem, & non ex libero arbitrio, sed sui natura nullo modo posse cassam reddi, ac sine tali efficaci auxilio non posse voluntatem nostram producere actus necessarios ad salutem.

Quod non tollitur libertas arbitrii, sed remaneat ea saltem in sensu diviso, secus in sensu composito. Sensus divisus est considerando quid, quoad sui naturam (nempe quod sua natura voluntas libera est). Sensus compositus cum aliquo adjuncto, quo non potest effici, ut illud non sit, ad quod praecordinatur a Deo.

XLII. Dicit Molina, quod licet gratia praeveniens praecedat nostrum liberum arbitrium, & quod gratia cooperans non antecedit nostrum liberum arbitrium, sed concomitatur sicut virtutum habitus ad opera moralia facienda.

Disp. XXXIX.

XLIII. Quod gratia cooperans, neque tempore, neque natura praecedat influxum liberi arbitrii, sed sint simul, & ab invicem pendeant.

XLIV. Disp. XLIII. Quod liberi arbitrii est se aptare, & praeparare, disponere ad recipiendam gratiam praevenientem, sicque homines cum Deo cooperari ad recipiendam gratiam praevenientem.

Conci-

- (Concilium Arausic. c. 20. Multa in homine bona sunt,  
( quae non facit homo : Nulla vero facit homo bo-  
na, quae non praestet Deus, ut faciat homo.  
XLV. ( Molina intelligit de actibus supernaturalibus infusis per  
( gratiam praevenientem. Vel intelligendum de ope-  
( ribus, quae ad finem supernaturalem spectant, nem-  
( pe ad vitam aeternam.

Disp. XLIV. LIII.

- XLVI. Praedestinationem non ex electione, & efficacia auxilio-  
rum sed ex praevisis meritis, ex usus liberi arbitrii. Ex  
his non perdi usum liberi arbitrii in adultis asserit. Negat  
alios esse praedestinos adultos, alios vero non.

- XLVII. Quod efficacia auxiliorum pendet ex libero arbitrio.  
Quaest. XXIII. art. 4. & 5. Disp. XI. de praedest. membr. 4.  
contra eos disseritur, qui dicunt ante gratiam praevenien-  
tem praevissum bonum usum liberi arbitrii ex congruitate  
causam, vel rationem esse praedestinationis adultorum.  
( Hoc vere Molina, quia bene addit meram Dei volunta-  
tem esse causam praedestinationis.)

Membr. 5. An post gratiam praevenientem praevissum bonum  
usum liberi arbitrii sit causa, & ratio praedestinationis.  
Tenent plures esse causam quidem praedestinationis, non  
tamen ex merito, sed ex congruentia, hi redarguuntur a  
a Molina, & bene.

- XLVIII. Molina pag. 399. ait, & alibi saepe, dari posse, ut duo-  
bus in peccato mortali existentibus, & Deo largiente aequa-  
lem utrisque gratiam, alter resurgat, alter non resurgat.

- XLIX. Item effici posse, ut alteri majorem gratiam conferens,  
ille non resurgat, & alteri minorem gratiam conferens,  
iste resurgat: ergo ex liberi arbitrii efficacia id dependet.

- L. Molina ponit scientiam mediam, qua Deus scrutatur, quid  
quisque ex libera voluntate facturus sit, vel non facturus  
pag. 227. Sed non quia Deus intelligit, aliquid futurum  
esse, sed e contrario, quia illud cognovit esse futurum  
intellexit, adeout scientia Dei non fuerit causa effectus il-  
lius, sed potius ille effectus fuerit causa scientiae Dei.  
Haec pag. 232. 234. 238.

- LI. Quae pendet ex libero arbitrio non dari aliquid verificari  
in sensu composito, quod non sit in sensu diviso pag. 234.  
2. 235.

2. 235. 1. eo quod non sit determinatio divinae scientiae, antequam eveniant.

**Error Pelagianorum.** Dum admittunt gratiam in omnibus, praecedere tamen dicunt voluntatem, gratiam subsequi semper: Fides Catholica habet praecedere gratiam in omnibus . . . . . Ex Epistola Prosperi ad Augustinum pag. 543. infra, ubi ait: priorem volunt obedientiam esse, quam gratiam: ut voluntas hominis divinae gratiae sibi pariat opem (non gratia humanam sibi subjiciat voluntatem), ac supra, sicque praevaricator quis dicatur, quia noluit, fidelis autem & justus quia voluit. Sicque voluntatem gratia sequatur, cum e contra ex Epistola Hilarii ad Augustinum de Sententia Pelagianorum, non negari ab eis gratiam, si dicatur *tamen* praecedere voluntatem, quae gratiam volens, quaerat tantum Medicum, qui opem ferat, adjuvetur illa a gratia, non autem ab illa donetur, ut velit.

**Augustinus ad Prosper. & Hilar. lib. 1. cap. V. in fine.** „ Cre-  
 „ dere, vel non credere, esse in arbitrio voluntatis huma-  
 „ nae, sed in electis praeparatur voluntas a Domino. Multi  
 „ audiunt verbum veritatis, sed alii credunt, alii contradi-  
 „ cunt. Volunt autem isti credere, nolunt autem illi.  
 „ Quis hoc ignoret? Quis hoc neget? ~~sed~~ cum aliis praepa-  
 „ retur voluntas a Domino, & aliis non praeparetur, cum  
 „ lib. I. c. 8. in illa verba Joannis: Omnis qui audivit a Pa-  
 „ tre, & didicit, venit ad me, „. Et infra: „ Nec unquam  
 „ gratia, quae occulta humanis cordibus, Domini largitio-  
 „ ne tribuitur, a nullo duro corde respuitur, ideo quippe  
 „ tribuitur, ut cordis duritia primitus auferatur, „. Et cap.  
 „ eod. inferius. ista. subdit. „ Quod a Deo *paretur*, ut quis  
 „ velit, „; aitque: „ si non facit volentes ex nolentibus  
 „ Deus, cur orat Ecclesia, ut persecutores convertantur,  
 „ ut velint. Quid ergo oramus pro nolentibus credere,  
 „ credere nisi ut Deus in illis operetur, & velle?

**Cap. X.** „ Differentia inter praedestinationem, & gratiam. Prae-  
 „ destinatio est praeparatio ad gratiam. Gratia est ipsa do-  
 „ natio. Differentia inter praedestinationem, & praescien-  
 „ tiam. Praedestinatio sine praescientia esse non potest, praescientia esse potest sine praedestinatione „. Et infra:  
 „ Ipse facit, ut illi faciant, quod praecepit: non illi faciunt,  
 „ ut ipse faciat, quod promissit, &c. .... Sententia est Pe-  
 „ lagia-

lagianorum secundum merita nostra gratiam dari, catholice secus gratiam gratis dari, cui datur, quoniam non volentis, nec currentis, sed est Dei miserentis.

Ex lib. 2. cap. 2. Catholica docet Ecclesia, gratiam Dei non secundum merita nostra dari, quoniam dona Dei sunt. Et cap. 6. At enim voluntate sua quisque deserit Deum, ut merito deferatur a Deo. Quis hoc negarit? Sed ideo petimus, ne inferamur in tentationem, ut hoc non fiat. Quod perseverantia sit ex dono Dei, gratia ejus, istud incipiens, & confirmans.

Voluntate sua cadit, qui cadit: voluntate Dei Patris stat qui stat. Part. 1. cap. 8. & cap. 23. Bonum non tenemus nisi propria voluntate; non tamen teneremus, nisi in nobis ipse operaretur & velle.

Hormisda Papa Epistola ad Possessorem. „ De libero tamen arbitrio, & gratia Dei, quod Romana, hoc est Catholica sequatur, & servet Ecclesia; licet in libris Beati Augustini, & maxime ad Hilarium, & Prosperum possit agnoscitur; tamen in scriniis Ecclesiasticis expressa capitula continentur, quae si tibi desunt, & necessaria creditis, destinabimus „. Haec Hormisda.

Quaenam autem fuerint ista capitula, in secundo Concilio Arausicano continentur., missa ipsa ab Apostolica Sede ad Galliarum Episcopos, ut ipsi ejus Concilii praefatione testantur, his verbis: „ Unde & nobis secundum auctoritatem, & admonitionem Sedis Apostolicae justum, & rationabile; visum est, ut pauca Capitula ab Apostolica nobis Sede transmissa, quae ab aliis Patribus de certis scripturarum voluminibus in hac praecipue causa collecta sunt, adversus eos, qui aliter, quam oportet, sentiunt ab omnibus observanda proferre, & manibus propriis subscribere, re deberemus „.

In ejus Canone 4.

Si quis, ut a peccato purgemur voluntatem nostram Deum expectare contendit, non autem ut etiam purgari velimus, per Spiritus Sancti infusionem, & operationem, in nobis fieri constitetur; resistit ipsi Spiritui Sancto, per Salomonem dicenti: *Praeparatur voluntas a Domino*: & Apostolo salubriter praedicanti, Deus est qui operatur in nobis velle, & perficere pro bona voluntate. Cujus Canonis sensus

pendet;



pendet a doctrina S. Augustini lib. I. ad Prosperum, & Hilarium, ubi hoc ostendit, voluntatem non praecedere gratiam, sed gratiam ipsam praecedere, & disponere voluntatem, ut bene velit, non ut tollat liberum voluntatis arbitrium, sicut cum ait, volunt autem isti credere, nolunt autem illi.

Quis hoc ignoret? quis hoc neget? sed aliis praeparatur voluntas a Domino, aliis non praeparatur, Lib. I. cap. V. & lib. II. cap. VI.

At enim voluntate sua quisque deserit Deum, ut merito deferatur ab eo. Quis hoc negaverit? Et cap. 23. Donum non tenemus nisi propria voluntate, non tamen teneremus nisi in nobis operaretur & velle.

In Concilio Lugdunensi in professione Fidei ex sententia synodi pradiſti edita a Lucido Presbytero: „ Ita autem asserimus, gratiam Dei, ut ad usum hominis, & conatum gratiam, semper adjungam, & libertatem humanae voluntatis, non extinctam, sed attenuatam, & confirmatam esse pronuntiamus, & c.

In Concilio Tridentino sess. VI. de justificatione cap. V. „ Tamen „ gente Deo cor hominis per Spiritus Sancti illuminationem „ nem, neque homo ipse nihil omnino agat, inspiratione „ nem illam recipiens, quippe qui illam & abjicere potest „ neque tamen sine gratia Dei movere se ad justitiam „ ram illo libera sua voluntate possit „ Et Sessione V. Canone IV. „ Si quis dixerit, liberum hominis arbitrium „ trium a Deo motum & excitatum, nihil cooperari asserendum „ tiendo Deo excitanti atque vocanti, quo ad obtinendam „ justificationis gratiam se disponat, ac praeparet, neque „ posse dissentire si velit, sed velui inanime quoddam nomen „ hil omnino agere, mereque passive se habere, anathematizandum „ ma sit.

De efficacitate gratiae S. Augustinus ad Prosperum, & Hilarium c. 8. pag. 550. C. D. ait. „ Haec itaque gratia, quae „ occulte humanis cordibus divina largitate tribuitur, „ nullo duro corde respuitur. Ideo quippe tribuitur, „ cordis duritia primitus auferatur „ Haec Augustinus illud declarans: *Nemo venit ad me, nisi Pater meus traxerit eum.* Et illud: *Omnis, qui audit a Patre, & dicit, venit ad me.* At Augustinus non dicit a nullo duro

*corde respui potest, sed respuitur*: non voluisse significare, quae in eisdem libris tradit, secundum ea, quae superius dicuntur.

- LII. Semipelagianorum est dicere, quod voluntas hominis divinae gratiae pariat opem; non gratia humanam sibi subiciat voluntatem. Haec ex Epistola Prosperi ad Augustinum Tom. 7. Aug. pag. 543. in fine. Est hic error Molinae, qui ait, gratiam ex libero arbitrio efficaciam sumere. Sana sententia est: Non ideo quis adjuvetur, quia voluit, sed quia adjuvatur, ut velit, semperque gratiam praecedere voluntatem.
- LIII. Semipelagianorum est sententia, ut per naturalem facultatem, petendo, quaerendo, pulsando accipiat, inveniat, & introeat, hisque bonis naturae bene usus, ad salutarem gratiam initialis gratiae ope meruerit pervenire. Item Prosper ad Augustinum pag. 543. 6. Huic affinis est Molinae sententia, qua ait, qui facit, quod in se est, Deus non denegat gratiam: sicque, ut ait Prosper, gratiam comitem non praeviam faciat humanorum meritorum, eamque illis volentibus subdere.
- LIV. Semipelagianorum est, praescientiam astruere humanorum meritorum, non eorum, quae Deus ipse facturus esset, ibidem Prosper. Affinis est his sententia Molinae, qua asserit esse praescientiam in Deo boni usus liberi arbitrii, qui licet gratiam non mereatur accipere, aliquid tamen operari.
- LV. Semipelagianorum est, ut perseverantia praecedenti libero humano arbitrio tribuatur. Hilarius ad Augustinum pag. 545. Est his affinis Molina. Contrarium sentit omnino S. Augustinus, ut perseverantia omnino sit donum Dei, & gratiam liberum praevenire arbitrium, ipsum actum volendi perseverantiam.

Semipelagianorum est asserere, causam praedestinationis esse bonum usum liberi arbitrii, non Dei voluntatem simpliciter. Ibidem Hilarius. Contra haec pluribus Augustinus.

S. Augustini assertae sententiae contra Semipelagianos, quod fides sit mere donum Dei, toto libro de praedestinatione Sanctorum.

Quod & perseverantia mere sit donum Dei, toto libro de bono perseverantiae.

Quod semper praeparatur electis a Deo voluntas, ut velint omnino pag. 549.

Quod